

Date – 17/04/2026

Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Centre for Environmental & Social Justice (CESJ) ten Aizawl Lammual chhehvel kawngpui hnaia ding thingkung engemaw zat kih tura hma lakna an dodal chu thuneitute nen kar thar thawhtanni April ni 20-a an inbiak dawn avangin tihtawp lailawk a ni.
2. National Highway-02 kawng laih meka lungawi lohna lantir nana Joint YMA Zobawkin Total Bandh nimin zing atanga an huaihawt chu thuneituten kawngpui siam hnathawh an intiam avangin nizan dar 8 khan tih tawp a ni.
3. Aizawl District Court chuan Mizo Carbon thubuaiah Minister hlui Pu Zodintluanga Ralte thiam a chantir.
4. Prime Minister Narendra Modia chuan ramchhung mipui zaa 50 ten thutlukna siamna kawngah tun aia tama tha an thawh ve a hun tawh a ni a ti.

<><><>

CESJ PROTEST

Centre for Environmental & Social Justice (CESJ) ten Aizawl Lammual chhehvel kawngpui hnaia ding thingkung engemaw zat kih tura hma lakna an dodal chu thuneitute nen kar thar thawhtanni April ni 20-a an inbiak dawn avangin tihtawp lailawk a ni.

CESJ Working Chairman Pi Vanramchhuangi chuan Sawrkar nena inbiakna a awm dawn avangin chawhlsan rih an tum thu a sawi a, Aizawl Lammual chhehvel kawngpui hnaia ding thingkung engemaw zat kih tura hma a lakna chu thih huamin an dodal zel dawn tih a sawi.

Tunkar Thawhlehi khan Vanapa Hall epa AR ram chhuah an huam chhunga thingte chu Aizawl Bazar Bungkawn leh Dâk Inpui inkar kawng tihzauhna tura kawng laih zauh nan kih tan a ni a, hemi an hriat veleh CESJ-te chuan hma la in, thingkih hi chhonzawm a nih loh nan nimin leh vawiin khan thingkit tute an dang a; thingkih hi chhonzawm a ni ta rih lo a ni.

CESJ working chairman Pi Vanramchhuangi chuan Akashvani News Aizawl zawhna chhangin, sorkarin thing kit zâwnga kawngpui tih zauh a tumna chu tha lo an tih thu a sawi a, kawngpui zau tha leh nuam chu anni pawhin an duh tho rualin, helai hmun zîmtea thing 176 lai kawng tihzauh nana kih hian Aizawl khawpui traffic tawt a tihziawm phah an rin loh thu sawiin, thih huama an hmalaknin awmzia a neih loh chuan Court hial pawh an kal dawn tih a sawi.

Sorkarin thing kih tur a chhinchhiah 176-te hi venghim turin thih huamin an tang dawn tih sawiin Pi Vanramchhuangi chuan, Assam Rifles-in Lammual leh a

chhehvel an chhuahsan hma deuh khan thing awmzat chhiarna an neih thu a sawi a, thing 480 vel an chhiar a, chu'ng zingah chuan khawvela thing vâng tak tak leh boruak tha (oxygen) pe chhuak hnem tak takte pawh a awm a ti.



MIZORAM TRANSFORMATION MOVEMENT

Mizoram Transformation Movement chuan Assam Rifles chhuahsan rama thingkung hlu bikte chu zuah ni se an duh thu an sawi.

Thuchhuah an siamah Mizoram Transformation Movement chuan, Assam Rifles chhuahsan Lammual ram chhevela thingkung 169 zet kit tura ruahmanna siam a ni leh kih chhoh mek a ni chu pawh an tih thu an sawi a. Heng thingte hi kit lova hum hram dan zawn a pawimawh tih an sawi a, heng thingte hi kih a nih a, hmalakna kalpui zui zel a nih hmain ngaih pawimawh tur tam tak a awm ni-a an hriat thu an sawi.

MTM chuan, Lammual leh PUC ramngaw chu Aizawl Chuap, boruak thianghlim petute an ni a, thing kih tur thenkhat chu Heritage Site leh Protected Area chhunga awm an ni a, heng thing upa tak takte kit tur hian State Sorkar a Forest Department bakah National Monument Authority emaw, State-level Heritage Conservation Committee atanga phalna lak a ngai thin a; chungte chu lak a ni em tih an zawt a. Heng thing kit tur hian, Supreme Court thupek angin, a ai awh tur phunna - Compensatory Afforestation siam a ni em tih leh siam a nih chuan a siamna hmun leh ruahmannate mipui hriattir ngei ni se an duh thu an sawi.



AKASHVANI DONATES CMRF

Akashvani Aizawl chuan nimin khan Chief Minister Relief Fund atan cheng sing 2 an pe.

Akashvani Aizawl aiawh hian Director leh Mizoram Cluster Head Pu DR Lalropuia chuan Chief Minister Pu Lalduhoma hnenah Chief Minister Relief Fund hi a hlan a, he hunah hian Asst Director (Prog) Pu Biakchungnunga leh Asst Director (News) Gin Gangte leh Akashvani thawktute an tel a ni.

Relief Fund hlanna ah hian Chief Minister hi Akashvani in kum 90 tlin lawmna June ni 8-a a buatsaih turah khuallian atan sawm a ni a, Akashvani kum 90 tlin lawmna hi Vanapa Hall a neih tur a ni a, Pu Lalduhoma hian function-a khuallian a nih dawn bakah Akashvani kum 90 tlin lawmna Monument Akashvani station Tuikhuahtlangah a hawng dawn bawh a ni.

Akashvani Aizawl Director leh Mizoram Cluster Head Pu DR Lalropuia chuan Akashvani kum 90 tlin lawmna chu ropui taka lawm tum ani a ti a, Programme hrang hrang buatsaih ani dawn tih sawiin chak taka inbuatsaihna kalpui anih thu a sawi bawh.



ZOBAWK BANDH

National Highway-02 kawng laih meka lungawi lohna lantir nana Joint YMA Zobawkin Total Bandh nimin zing atanga an huaihawt chu thuneituten kawngpui siam hnathawh an intiam avangin nizan dar 8 khan tih tawp a ni.

Zobawk Jt YMA hian nimin khan an khaw paltlangtu kawngpui chu dang pingin Total Bandh an huaihawt a, Lungleia kan correspondent sawi danin, Zobawk khawtlang hi an thawkchhuak tha a, chhungkaw tin atanga mi pakhat zel duty turin an chhuak a, an lungawiloh lantir nan puandum in tinah zar a ni.

Nimin khan DC kaihhruaiin kawngpui siamtu NHIDCL leh YMA thukhawmin hetah hian Magistrate vilna hnuaiah kawngpui siam hna thawh tan ni se tiin Zobawk khawtlang hruiute chuan an ngen a, Zobawk thutchilh mektu Magistrate Pu Thlengliana chuan khawtlang mipui te chu sorkar thuchhuak ngaichang turin a hrilh a, contractor lamin hna an thawh dawn tan dawn thu a sawi a, kawng dan avang hian Zobawk bulah lirthei tam tham tak a tangkhang a ni.

<><><>

DRUGS SEIZED

Nimin khan Mizoram hmun hrang hrangah Ruihhlo Do kawnga hmalaktuten ruihhlo thanhem tak an man.

Excise & Narcotics Department chuan nilaini khan Folkland Park bul-ah Methamphetamine Kg. 10.021 (Mum 1,00,000) leh a neitu-a puh mi pahnih - Jakaria Hussain (kum 28) Karimganj, Assam leh Taj Uddin (kum 25) Karimganj, Assam ni-a inchhal an man a. An chhui zuinaah Myanmar atanga heng Methamphetamine lo kengtu - Lalnunziri (kum 38) Khawmawi, Myanmar nia inchhal chu tlai dar 4:30 khan Khatla-ah an man a. A phurh kualna atana lo puitu Vanlalrintluanga (kum 27) Armed Veng South, Aizawl ni-a inchhal pawh nizan khan man leh a ni.

Mamit District Excise & Narcotics chuan ningani khan Tuidam bawlhhlawh paihna bulah Heroin Hawng 2 an man a, a neitu-a puh Somba (kum 29) leh CK Benylasan (kum 24) Kollalian, Sarete khaw mi ve ve ni-a inchhal an man nghal a ni.

Khawzawl Police Special Team chuan nimin khan Neihdawn Junction-ah lirthei endikin scooter pakhat atangin ruihhlo thahnem tak an man.

Lirthei khalhtu hi Lalhriatpuia (kum 25) Lunglei Chanmari ni-a insawi niin a rawksai atangin Heroin hawng 9 hi a phawrh a, Police Duty te chuan thuhretute hmuh laiin an man a ni.

Khawzawl Police-in Heroin an man hi cheng nuai 20 leh sing 8 hu a ni. A neitu puh hi ND&PS Act hmangin Khawzawl Police Station-ah thubuai siam sak a ni a, ruihhlo tawlhnaa inhnahmhnawih dang an awm leh awm loh an chhui chhunzawm mek a ni.

<><><>

AIZAWL DISTRICT COURT

Aizawl District Court chuan Mizo Carbon thubuaiah Minister hlui Pu Zodintluanga Ralte thiam a chantir.

Kum 2017, September ni 1 khan 'Hruaitu Arsi' chanchinbu chhuakah Pu Zodintluanga Ralte chuan Mizo Carbon atanga hlawkna hmu angin tarlan a ni a, A chungchang ziah danah hian lungawi lovin Pu Zodintluanga Ralte chuan khatihlaia he chanchinbu Publisher M.C. Lalrinthanga, Khatla South leh Editor, Lalthanzama Hnamte, Khatla South lakah kum 2017, September ni 18 khan FIR a thehlut a ni.

He thubuai hi kum 2018, April ni 24 khan ngaihtuah tan a ni a, kum 8 hnuah thubuai ngaihtuah Aizawl District Court chuan Pu Zodintluanga Ralte chu vawiin khan thiam a chantir a. Court chuan chanchinbua thu ziaktute chu lung in tan aiah pawisa a chawitir a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

HOME VOTING

Aizawl Municipal Corporation-AMC inthlan atana Home Voting ah mi 2,594-in vote an thlak a, vote tla hi zaa 93 point 71 a tling.

Home voting hi tunkar Thawhtanni atang khan kalpui tan niin, nimin tlai dar 5 kha a tawp hun a ni a; nimin tlai dar 5 thleng khan Home Voting ti tura dilna lut 2,768 zinga mi 2,594-in vote an thlak a; za zela 93 point 71 niin, vote thlak lo mi 174 an awm.

Home Voting buaipuitute chuan Akashvani News Aizawl zawhna chhangan, vote thlak dil zinga vote thlak leh lo an awm chhan chu an ina an va kalchilh hnuah vote thlak leh duh lo te, damlohna avanga inentira kalchhuakte leh a then chu lo boral tawhte an awm vang a nih thu an sawi.

AMC inthlan atana Home Voting hi vote thlakna hmun (polling station) pan thei lo - kum upa te, damlo natna khirh bik nei leh pianphung a rualbanlote tan ruahman a ni a; AMC Ward 19-ah kalpui niin, ward tinah Home Voting Team pakhat theuh awm an awm a ni.

<><><>

CHAMPHAI MHIP DONATES BLOOD

New Champhai Branch Mizo Hmeichhe Insuihkhawm Pawl (MHIP) chuan nimin khan branch hminga a vawi li-na (4) atan Champhai District Blood Bank ah a mamawh apiangin an hman turin thisen unit 14 an pe a.

New Champhai Branch Mizo Hmeichhe Insuihkhawm Pawl (MHIP) hi Mizoramah MHIP Branch hminga thisen pe awmchhun an ni mek a, Kum 2017 ah khan MHIP Day pualin thisen an pe a, kum 2019 ah Vangpui Kut pualimn thisen an pe a, kum 2025 leh 2026 ah an Branch Rising Day pualin thisen an pe a, New Champhai Community hall ah Blood Bank a thawktuten an thisen an lak sak a ni.

<><><>

PARLIAMENT ON WOMEN RESERVATION

Prime Minister Narendra Modia chuan ramchhung mipui zaa 50 ten thutlukna siamna kawngah tun aia tama tha an thawh ve a hun tawh a ni a ti a. Nimina Lok Sabha-a Women's Reservation kaihhnawih bill sawihonaah he thu hi sawiin Pu Modia chaun ram hmasawna kawngah leh policy siamna kawngah hmeichhiate an tangkaiin an thawhhlawk tawh hle a ti a. Opposition party te pawh he dan thar chungchangah hian politics hamthatna lak tum lo tura ngein mi zawng zawng tan leh ram roelna atana thil tha ber tur zawk anih thu a sawi a ni.

Nimin khan nit hum awh tur Women's Reservation Bill chungchang sawihoin abika Lok Sabha Budget session thutkhawm tan a ni a. Bill pathum Constitution (131st) Amendment Bill, Delimitation Bill, 2026, leh Union Territories Laws (Amendment) Bill, 2026 te house ah putluh a ni a.

Ram danpui siamthatna tur leh Hmeichhiate tana seat hauhsakna tur bill puluttu Union Law Minister Arjun Ram Meghwal chuan hun chhinchhiahtlak tak an hman thu a sawi a. Hmeichhiate tan politics ah roelna dik pek a ni tawh dawn a ti a. He dan thar hian hmeichhiate tan intluktlanna a thlen dawn a ti a. Hmeichhiate tana seat zaa 33 hauhsak hun a thleng tawh a ti a. Hetianga seat hauhsak an nih dawn chuan Lok Sabha seat chu zaa 50-a tihpun a tul dawn a ti a. Lok Sabha seat chu avaiin 815 ah a kai chho tawh ang a ti a. Heta tang hian 272 chu hmeichhiate tana hauhsak a ni ang a ti.

Hetihlai Samajwadi Party hruaitu leh MP Akhilesh Yadav chaun hmeichhiate seat hauhsak chu an thlawp thu a sawi rualin hetiang ang dan pawimawh tak mai hmanhmawh taka sawrkarin a nawr chu an duh lo a ti a. Tuna rampum chhiarpui neih mek zawh hunah hmeichhiate tana seat hauhsakna bill hi chu putluh chauh tur a nih thu a sawi a ni.

Congress hruaitu Gaurav Gogoi pawhin women's reservation chu an thlawp a ti a. Pu Gogoia chuan bill an thlawp rualin seat awmsa ti pung loin 543 ah hian hmeichhiate tana hauhsak zat bithliah an duh thu a sawi a. Sawrkar chu tul lovah he bill hi a tikhawtlai nia puhin rang taka hman an duh thu a sawi a ni.

<><><>